

## SANDE 4 BILONG LEN

### 1. RIT

Jos 5:9-12

*Akar dapanim: Godin gumamaziziba ghua a me ko akam akirizir gnuazimin ghue, egha dughiar a me ataghizi me azenan izezim(pasova)ginighnigha isar ekiam gami.*

**Akar kam, akinafarir Josua osirizimin aven iti.**

Ezi Ikiavira Itir God kamaghin Josua migia ghaze, “Ia faragha pura Isipian ingangarir gumazir kinibar min ikia bar aghumsiki. Ezi ki datirighin ia da aghumsizir kam batoke.” Kamaghin datirighin danganir kam, me Gilgal a garigha a diboravira iti.

Dughiar kam Israelia Gilgalin danganim aghuigha an iti, a Jerikon nguibamin boroghin danganir zarimin iti. Egha iakinim Nisan, an dughiar 14in guaratizimin, me Ikiavira Itir God Israelia Gitazir Dughiam

Ginighnighamin Isam gamua ghuavira iti. Egha amimzaraghan Israelia Kenanin kantrin rais ko baliba ko witba ini. Me baliba tuegha, bretin yis puvatizibagh amua, egha da api. Dughiar kamin girara dagher mana ua iri puvati. Ezi Israelia, Kenanin nguazimin daghebaram api. Me uamategha mana isir puvati, egha azenir kamira me Kenanin nguazimin otivaghirir daghebaram api.

**Kar Godin Akam.**

### SAM

Sam 34:2-7

**Ia akam ikaragh: Ia ganigh fogh suam, Ekiamin araziba da bar moghira dera.**

Ki Ikiavira Itir God, zurara ziar ekiam a daningam.

Ki an ziam fi kamaghira ikiam.

Ikiavira Itir God nan akurazir bizir kam bagha,

ki a minabava a bagha bar akonge.

Gumamazizir osimtiziba ateriba, me bizir kam uaghan a baragh,  
men naviba bar moghira deragham.

**Ia akam ikaragh: Ia ganigh fogh suam, Ekiamin araziba da bar moghira dera.**

E bar moghira an ziar ekiamin gun mikimiva,  
egh an ziam fam!

Ki uabin akurvaghasa Ikiavira Itir Godin azangsizima, a nan azangsizim baraki.  
A nan atiatiba bar da batoghezi, ki datirighin navir amirizimin iti.

**Ia akam ikaragh: Ia ganigh fogh suam, Ekiamin araziba da bar moghira dera.**

Gumamazizir nighnizir gavgavim Ikiavira Itir Godin itiba, me bar akongegh.

Men nighnizir gavgavir kam, a iki gavgafigh, eghti me aghumsighan kogham.  
Gumazir onganarazibagh amiba, Ikiavira Itir God ko migeima,  
a me baregha men osimtizibar aven deragha men akurvasi.

**Ia akam ikaragh: Ia ganigh fogh suam, Ekiamin araziba da bar moghira dera.**

## 2. RIT

## 2 Ko 5:17-21

*Akar dapanim: E fomira Godin apaniba, egha krais bangin an e gamizi e navir vamirama a ko iti.*

### **Akar kam, akinafarir namba 2 Pol Korinin gumazamiziba baghava an osirizimin aven iti.**

Gumazitam Krais ko poroghti, God gumazir kam damighti, a gumazir bar igiam otogham. Eghti bizir ghurim bar givaghti, bizir bar igiam otogham.

Bizir kaba bar, God dagh amima, da e batifi. E fomira an apanibar min iti, ezi Kraisin ingangarimin an e gamizi, e datirighin an namakabar otifi. Egha a uaghan, ingangarir kam e ganingi, eghti an apanir igharazibar amighti, me an namakabar otivam. En migirigiam kamakin: God, Kraisin ingangarimin tuavimin, a nguazimin itir gumazamiziba bar me gamima, me Godin apanim gamir arazim ataghragha, egha an namakabar min otifi. Egha men arazir kurar me amiziba, a ua dagh nighnizir puvati. Egha a ingangarir kam e ganiga ghaze,

ia akam nan apanibav kinighti, me oregh egh nan namakabar otivigham. Kar e Kraisin abuir gumazibar otivigha, mati God uabi uan dimdiam ia ganingizi moghin, e akar kam ia mikiri. Kamaghin, e Kraisin danganim isa, ia gakaghora ghaze, ia Godin apanim gamir araziba ategh an namakabar otifigh. Krais uabi arazir kuratam gamizir puvati. Ezi God kamagh sua, e Krais ko porogh, egh an gavgavimin e Godin damazimin gumazamizir aghuibar otivam. Kamaghin, God en akurvaghasa egha, en arazir kuraba bar Krais gisin da ariki, ezi Krais mati uaghan gumazir arazir kurabagh amir mamin min oto.

**Kar Godin Akam.**

## WELKAMIM GUTNIUS

*Ekiyam Krais Iesus, e nin iziam fa iziar ekiyam ni ganidi.*

Ki dikavigh uamategh uan afeziam bagh mangam. Egh a miki suam, 'Afeziam, ki God ko nin damazimin arazir kuram gami.'

*Ekiyam Krais Iesus, e nin iziam fa iziar ekiyam ni ganidi.*

## GUTNIUS

## Lu 15:1-3, 11-32

*Akar dapanim: Nin tuebam aremegha, datirighin ua dikavigha angamra iti.*

### **Ia, Krais Iesusin Akar Aghuir Luk osirizim, a baragh.**

Ezi arazir kurabagh amir gumaziba ko dagiaba isir gumaziba, me Iesus baraghasa anekuvagha iti. Ezi Farisiba ko Judan arazibagh fofozir gumaziba an atara a migia ghaze, "Gumazir kam gumazir arazir kurabagh amiba ko migia me koma api." Ezi Iesus akar isin zuir kamin me migei,

Egha Iesus migia ghua kamaghin migei, "Gumazir mam otarir pumuning iti. Ezi dozim kamaghin uan afeziam migei, 'Afeziam, ni ga bagha tuirazir

biziba nananaba na daningigh.' Ezi aningin afeziam uan biziba aning bagha da tura.

"Ezi a mong gin uan biziba akuvagha da inigha saghon itir nguibar mamin ghu. Egha nguibar kamin ikiava pura tintinimin arazir kurabagh amima, an dagiaba bar gifa. Ezi an dagiaba bar givazima, ezi nguibar a itir kam dagheba puvatizir dughiam oto. Ezi a ua bizitam itir puvati. Kamaghin amizi, a ghua nguibar kamin itir

gumazir mamin ingarasa a bato. Ezi a anemadazi a ghua an dabar gara dar akuagh api. Ezi gumazitam daghetam a ganingizi puvati. Kamaghin amizi, a dabar gari da nguezibar miseviba api. Ezi a uaghan tabar amasa bar ifonge.

“Ezi datirighin nighnizir aghuarim an izima, a kamaghin migei, ‘Nan afeziamin ingangarir gumaziba dagher aviriba iti. Ezi ki kagh mitiriam bangin aremegham. Ki ti uamategh uan afeziam bagh mangi kamaghin a mikimam, “Afeziam, ki arazir kuramin God ko ni gami. Ki datirighin gumazir aghuim puvati. Eghti ni borim na darighan marki. Ni na ateghti ki pura nin ingangarir gumazimin min ikiam.” ’ Egha a dikavigha uan afeziam bagha zui.

“Ezi a saghon izavira itima, an afeziam an apigha bar an apangkufi. Egha an a bagha ivegha ghua uan agharimningin a muigha an tori.

“Ezi an otarim kamaghin a migei, ‘Ki arazir kuram God ko ni gami. Ki ua gumazir aghuim puvati, ni borim na darighan marki.’ Ezi an afeziam kamaghin uan ingangarir gumazibav gei, ‘Ia zuamira! Korotiar bar aghuir ruarim inigh iziva a darugh. Egh ring an dafarim darugh, egh dagarir asuaba a daghuigh! Nan borim ovegha ua iti. Egha ovengezi e uam an api. Kamaghin ami, ia mangi bulmakaun nguzir mikarzim sara itim a inigh iziva

a misuegh e anemiva a givarvaram.’ Egha me a givarvara isam gami.

“Ezi dughiar kamin otarir ekiam azenibar ikegha izi. A dipenimin boroghin iza orazi, me ighiabagh amua izi ighiam gami. Ezi a uan afeziamin ingangarir gumazir mamin diagha an azara, ‘Marazi tizim gami?’ Ezi a an akam ikara, ‘Nin dozim uamategha ize. An aremezi puvatigha deravira ikiava uamatenge. Kamaghin, nin afeziam a bagha bulmakaun nguzir mikarzim sara itim misoke.’

“Ezi an otarir ekiam atarava dipenimin aven mangan aghua. Ezi an afeziam azenan ghua aven mangasa a gakaghoravira iti. Ezi a uan afeziamin akam ikara, ‘Ni gan! Ki azenir kabar ki pura ingangarir gumazir kinimin ikia pura nin ingara, egha nin Akaba batozir puvati. Ezi ni bar dughiatamin ki uan namakaba ko iki bar akueghasa ni memen nguzitam na ganingizi puvati. Ezi nin otarir kam arazir kurabagh amua amiziba ko ikia uan dagiaba a givagha izezi, ni bulmakaun nguzir mikarzim sara itim a bagha a misoke!’ Ezi afeziam kamaghin a migei, ‘Nan otarim, ni zurara na ko iti. Ezi nan biziba da nin biziba. Nin dozim ovegha ua dikafi. Egha an ovengezi e uam an api. Kamaghin amizi, e a bagh isam gamuava ivarvari.’ ”

**Kar, Kraiss Iesusin Akar Aghuim.**

